

四庫全書薈要

• 乾隆御覽本

集部

李太白集分類補註卷二十四

宋楊齊賢集註

元蕭士贇補註

感遇

越中秋懷

越水遶碧山周迴數千里乃是天鏡中分明畫相似一本

首四句云蹈海思仲連遊山慕康樂攀雲窮千峯弄水涉萬壑下同愛此從冥搜永懷臨

湍遊一為滄波客十見紅蕖秋觀濤壯天險望海令人  
愁路遐迫西照歲晚悲東流何必探禹穴逝將歸蓬丘  
不然五湖上亦可乘扁舟

效古二首

朝入天苑中謁帝蓬萊宮青山映輦道碧樹搖煙空謬  
題金閨籍得與銀臺通待詔奉明主抽毫頌清風歸時  
落日晚躑躅浮雲驄人馬本無意飛馳自豪雄入門紫  
駕驚金井雙梧桐清歌弦古曲美酒沽新豐快意且為

樂列筵坐羣公光景不可留生世如轉蓬早達勝晚遇

羞比垂釣翁

齊賢曰新豐事見前士賈曰此詩樂府富貴之體也

其二

自古有秀色西施與東鄰蛾眉不可妬况乃效其顰所

以尹婕妤羞見邢夫人低頭不出氣塞默少精神寄語

無鹽子如君何足珍

齊賢曰西施與東鄰顰及尹婕妤羞見邢夫人事並見前士賈曰此

詩刺時以色相尚而不好德者故末句反言之曰寄語無鹽子如君何足珍也

擬古十二首

士賈曰擬古者擬古詩也古人多有此體至於句意亦不大相遠焉

青天何歷歷明星如白石黃姑與織女相去不盈尺銀  
河無鵲橋非時將安適閨人理紈素遊子悲行役瓶冰  
知冬寒霜露欺遠客客似秋葉飛飄飄不言歸別後羅  
帶長愁寬去時衣乘月託宵夢因之寄金徽

齊賢曰古樂府東飛

伯勞西飛燕黃姑織女時相見淮南子烏鵲填河成橋而渡織女又曰見瓶水之冰而知天下之寒唐羈縻州有金徽州隸振武軍士賁曰古詩衆星何歷歷梁宗慄荆楚歲時記黃姑即河鼓也蓋語訛所致云爾雅河鼓謂之牽牛庾師成遠期篇憶別春花飛已見秋葉稀淚眼羞明鏡愁帶減寬衣得書未言反夢見道應歸坐使紅顏歇獨掩青樓扉此篇傷時窮兵黷武行役無期度男女怨曠不得遂其室家之情感時而悲者焉哀而不

傷怨而不誹真有國風之體  
此晦菴之所謂聖於詩者歟

其二

高樓入青天下有白玉堂明月看欲墮當牕懸清光遙  
夜一美人羅衣沾秋霜含情弄柔瑟彈作陌上桑絃聲  
何激烈風卷遠飛梁行人皆躑躅棲鳥去迴翔但寫妾  
意苦莫辭此曲傷願逢同心者飛作紫鴛鴦

齊賢曰古詩西北有

高樓玉堂陌上桑及韓娥歌響繞梁鴛鴦事並見前士  
實曰長門賦懸明月以自照兮徂清夜於洞房此詩喻  
賢者懷才抱藝有以聳動人之耳目而不肯以  
身輕許於人思得同心同德者而依附之也

其三

長繩難繫日自古共悲辛黃金高北斗不惜買陽春石  
火無留光還如世中人即事已如夢後來我誰身提壺  
莫辭貧取酒會四鄰仙人殊恍惚未若醉中真齊賢曰古樂府  
鑿石見火能幾時潘岳詩欸如敲石火提壺云提壺  
沽美酒士贇曰此篇連生者之詩也古詩中有此體

其四

清都綠玉樹灼爍瑤臺春攀花弄秀色遠贈天仙人香  
風送紫藥直到扶桑津取掇世上豔所貴心之珍相思

傳一笑聊欲示情親

齊賢曰列子云清都紫微鈞天廣樂帝之所居士贊曰此遊仙詩體

其五

今日風日好明日恐不如春風笑於人何乃愁自居吹  
簫舞彩鳳酌醴繪神魚千金買一醉取樂不求餘達士  
遺天地東門有二疏愚夫同瓦石有才知卷舒無事坐

悲苦塊然涸轍鮒

齊賢曰蕭史吹簫感鳳凰來事見前漢書疏廣疏受稱病乞骸骨上許之

公卿故人邑子祖道供帳東都門外士贊曰按鮒字本作魚若作魚是重一字今當作鮒莊子守鮒鮒注曰鮒音附又音蒲李云鮒鮒皆小魚也當作鮒音蒲無疑此篇亦達生而能與時卷舒者其太白之素志歟



其六

運速天地閉胡風結飛霜百草死冬月六龍頽西荒太  
白出東方彗星揚精光鴛鴦非越鳥何為眷南翔惟昔  
鷹將犬今為侯與王得水成蛟龍爭池奪鳳凰北斗不

酌酒南箕空簸揚

齊賢曰晉志太白西方秋金義也進退以俟兵其出東方失行中國敗妖

星一曰彗星所謂掃星小者數寸長或竟天見則兵起大水主除舊布新彗體無光傳日而為光故夕見則東指辰見則西指在日南北皆隨日光而指鷹將犬言昔  
鞠鷹牽犬獵於田野今皆為王侯矣大東詩曰維南有箕不可以簸揚維北有斗不可以挹酒漿士賁曰按此  
篇當是太白從永王璘時嘗作詩諷王勣王而王不從

知王不足與有為故作是詩也運連天地閉喻明皇晚年賢人隱而羣小用事也胡風結飛霜喻山兵叛也百草死冬月喻人民遭殺戮也六龍頽西苑喻明皇西幸也太白出東方彗星揚精光喻兵興除舊布新也驚鵲飛越鳥何為眷南翔喻王原非南人何為眷眷於南方也惟昔鷹將犬今為侯與王得水成蛟龍爭池奪鳳凰喻起於行伍而能立功者已致高位也今卒伍之徒能立功者尚致高位王何為眷眷然擁兵南方翱翔江上而不為勤王之舉以立功名取爵位也哉北斗不酌酒南箕空簸揚喻王終不足與有為如北斗之空有斗名而不可以挹酒漿南箕之空有箕名而不可以簸揚也言有盡而意無窮豈後人作詩明識顯刺者所可同哉

日語

## 其七

世路今太行迴車竟何託萬族皆凋枯遂無少可樂曠  
野多白骨幽魂共銷鑠榮貴當及時春華宜照灼人非  
崑山玉安得長璀璨身沒期不朽榮名在麟閣

士贇曰  
李善曰

春華喻少時也此篇乃熟識世故同歸  
於盡惟當因時立功名以傳不朽耳

其八

月色不可掃客愁不可道玉露生秋衣流螢飛百草日  
月終銷毀天地同枯槁蟪蛄啼青松安見此樹老金丹  
寧誤俗昧者難精討爾非千歲翁多恨去世早飲酒入

玉壺藏身以為寶

齊賢曰月令季夏之月腐草化為螢  
司馬相如云螭姑寒蟬也一名蜺螭

春生夏死夏生秋死神仙傳壺公賣藥於汝南市日入  
後跳入壺中士贇曰老子曰人之生也柔弱其死也堅  
強萬物草木之生也柔脆其死也枯槁太白素志學仙  
此詩是反古詩中服食求神仙多為藥所誤之意猶反  
騷云

### 其九

生者為過客死者為歸人天地一逆旅同悲萬古塵月  
兔空擣藥扶桑已成薪白骨寂無言青松豈知春前後

更嘆息浮榮何足珍

士贇曰古者謂死人為歸人莊  
子曰悲夫世人直為物逆旅耳

其十

僊人騎綵鳳昨下閨風岑海水三清淺桃源一見尋遺  
我綠玉杯兼之紫瓊琴杯以傾美酒琴以閒素心一物  
非世有何論珠與金琴彈松裏風杯勸天上月風月長  
相知世人何倏忽

齊賢曰東方朔十洲記崑崙有三角  
一角正北上正北辰星之曜名閨風

顛

其十一

涉江弄秋水愛此荷花鮮攀荷弄其珠蕩漾不成圓佳

期綵雲重欲贈隔遠天相思無由見悵望涼風前

士贇曰此

比興之詩也首兩句喻賢者慕君之爵位而欲仕也三句四句喻賢者纔得位而害之者已至也佳期是與佳人也  
人相期也釋楚詞者曰不敢指言君尊故托辭曰佳人也  
彩雲重者喻女謁譏夫之昌盛也欲贈隔遠天者喻賢者欲有所獻言於君去天遠而為女謁譏夫之所間隔也  
相思無由見悵望涼風前者喻雖思君而無從見君惟有悵望涼風之前以寄吾眷戀之意云耳涼風亦薄德之形容也辭微意顯可謂怨而不誹者矣

## 其十二

去去復去去辭君還憶君漢水既殊流楚山亦此分人生難稱意豈得長為羣越燕喜海日燕鴻思朔雲別久

容華晚琅玕不能飯日落知天昏夢長覺道遠望夫登

高山化石竟不返

齊賢曰淮南子曰西方之美者有崑崙之球琳琅玕註球琳琅玕皆美玉

登山望夫化石事見前卷士贇曰此篇其太白去國之時所作乎身在江海心居魏闕懷君憂國之意藹然見於言辭之表末四句意是嗟嘆之白雖遭時昏亂隔絕遠方然愛君之心猶石之堅也辭嚴意婉悲夫

感興八首

瑤姬天帝女精彩化朝雲宛轉入宵夢無心向楚君錦

衾抱秋月綺席空蘭芬茫昧竟誰測虛傳宋玉文

齊賢曰襄

陽者舊傳云赤帝女瑤姬未行而卒葬于巫山之陽故曰巫山之女楚王令宋玉賦神女事見前

其二

洛浦有宓妃飄飄雪爭飛輕雲拂素月了可見清輝解

珮欲西去含情詎相違香塵動羅襪綠水不沾衣陳王

徒作賦神女豈同歸好色傷大雅多為世所譏齊賢曰漢書音

義云宓妃宓義氏之女溺洛水為神曹植洛神賦曰髣髴兮若輕雲之蔽月飄飄兮若流風之迴雪又曰願誠

素之先達兮解玉珮以要之又曰凌波微步羅襪生塵

士賁曰高唐神女二賦乃宋玉寓言以成其文章洛神

賦則子建擬之而作後世之人如癡子聽人說夢以為誠有是事至為傳奇以實之惟太白知其托辭而識之

可謂識見高遠者矣



其三

裂素持作書將寄萬里懷  
眷眷待遠信竟歲無人來  
征鴻務隨陽又不為我棲  
委之在深篋蠹魚壞其題  
何如投水中流落他人開  
不惜他人開但恐生是非  
齊賢曰鄭玄注  
禮記曰素生帛也孔安國曰隨陽之鳥鴻鴈之屬蠹魚  
書中蟲也士贇曰晉書殷羨字洪橋為豫章太守都下  
人士因其致書者百餘匣行次石頭皆投之水  
中曰沈者自沈浮者自浮殷洪橋不為致書郵

其四

芙蓉嬌綠波桃李誇白日  
偶蒙春風榮生此艷陽質豈

無佳人色但恐花不實宛轉龍火飛零落互相失詎知

凌寒松千載長守一

士贇曰按此篇已見二卷古詩四十七首必是當時傳寫之誤編詩

者不能別姑存于此卷觀者試以首句比並而論美惡顯然識者自見之矣

### 其五

十五遊神仙仙遊未曾歇吹笙吟松風汎瑟窺海月西

山玉童子使我鍊金骨欲逐黃鶴飛相呼向蓬闕

士贇曰此

比興之詩以喻賢者相招以求祿仕

### 其六

西國有美女結樓青雲端娥眉艷曉月一笑傾城歡高  
節不可奪炯心如凝丹常恐彩色晚不為人所觀安得  
配君子共乘雙飛鸞士贇曰此篇喻賢者有所抱負審  
所去就不肯輕以身許人惟恐老  
之將至功業未建於時無聞思見  
君子盡心以事之與共祿位也

其七

竭來荆山客誰為珉玉分良寶絕見棄虛持三獻君直  
木忌先伐芬蘭哀自焚盈滿天所損沈溟道所羣東海  
有碧水西山多白雲魯連及夷齊可以躡青芬  
士贇曰  
按此篇

己見二卷古風三十六首但有  
數語之異編詩者故兩存之

其八

嘉穀隱豐草草深苗且稀農夫既不異孤穗將安歸常  
恐委疇隴忽與秋蓬飛鳥得薦宗廟為君生光輝

齊賢曰陶

潛詩種豆南山下草盛豆苗稀士贇曰此篇比興之詩  
刺時賢之不能引類拔萃以為國用者歟嘉穀隱豐草  
草深苗且稀喻賢人在野混於常人之中常人類多而  
賢人類少農夫既不異孤穗將安歸蓋謂農夫知稼穡  
者以喻惟賢則知賢也農夫見穀之在草而不別異之  
猶賢者見賢之在野而不能薦進之也如此則將安適  
歸乎常恐委疇隴忽與秋蓬飛者喻在野之賢惟恐老  
之將至埋光鏹彩與草木俱腐也鳥得薦宗廟為君生

光輝者以喻在野之賢冀望在位之賢引而進之以羽儀朝廷也嗟夫士懷才而不遇千載讀之猶有感激

寓言三首

周公負斧戾成王何夔夔武王昔不豫剪爪投河湄賢聖遇讒慝不免人君疑天風拔大木禾黍咸傷萎管蔡

扇蒼蠅公賦鵠鵠詩金縢若不啟忠信誰明之

齊賢曰明堂位

曰周公朝諸侯于明堂之位天子負斧戾南向而立武王既克商二年王有疾弗豫周公為三壇北面植璧秉珪乃告大王王季文王又武王既喪管叔及其羣弟沘言於國曰公將不利於孺子周公乃告二公曰我之弗辟我無以告我先王周公居東二年則罪人斯得于後公乃為詩以貽王名之曰鵠鵠王未敢誦公秋大熟未

獲天大雷電以風禾盡偃大木斯拔王啓金縢之書得  
周公代武王之說曰今天動威以彰周公之德惟朕小  
子其新迎我國家禮亦宜之王出郊天乃雨反風禾則  
盡起士賈曰此詩懼讒也渠括金縢之事以申其意耳

其二

搖裔雙綵鳳婉孌三青禽往還瑤臺裏鳴舞玉山岑以

歡秦娥意復得王母心區區精衛鳥銜木空哀吟

齊賢曰秦

娥弄玉也張揖曰三足鳥三足青鳥也主為王母取食  
士賈曰此篇比興之詩於時蓋有所諷刺焉彩鳳青禽  
以比倭幸之人瑤臺玉山以比宮掖秦娥以比公主王  
母以比后妃蓋以諷刺當時出入宮掖取媚后妃公主  
以求爵位者精衛銜木石以比小臣懷區區報  
國之心盡忠竭力而不見知者其意微而顯矣

其三

長安春色歸先入青門道綠楊不自持從風欲傾倒海

燕還秦宮雙飛入簾櫳相思不相見托夢遼城東

齊賢曰唐

京兆府長安縣即長安也霸城門民間謂之青門士賈曰此篇閨思詩也良人從軍滔滔不歸感時觸物而動懷春之思者歟綠楊海燕以起興也宛然國風之體所謂聖於詩者此哉

秋夕旅懷

涼風度秋海吹我鄉思飛連山去無際流水何時歸目  
極浮雲色心斷明月暉芳草歇柔艷白露催寒衣夢長

銀漢落覺罷天星稀含悲想舊國泣下誰能揮

士贇曰此詩太

白作於竄逐之後予身在遐荒心懷舊國詞意悲惋哀哉

### 感遇四首

吾愛王子晉得道伊洛濱金骨既不毀玉顏長自春可

憐浮丘公猗靡與情親舉首白日間分明謝時人二仙

去已遠夢想空慙慙

齊賢曰王子晉與浮丘公事見前士贇曰此詩蓋有所懷託二仙而

也言

### 其二



可嘆東籬菊莖疎葉且微雖言異蘭蕙亦自有芳菲未  
泛盈樽酒徒沾清露輝當榮君不採飄落欲何依士贊曰此  
篇喻賢者蒙朝廷養育之恩有才而不見用空受此恩  
也當可用之時而若不採之惟有飄零老死而已將安  
所依乎是  
可嘆也

其三

昔余聞姮娥竊藥駐雲髮不自嬌玉顏方希鍊金骨飛  
去身莫返含笑坐明月紫宮誇蛾眉隨手會凋歇士贊曰此

篇遊仙體也末句諷以  
色事人色衰愛弛者

其四

宋玉事楚王立身本高潔巫山賦綵雲郢路歌白雪舉

國莫能和巴人皆卷舌一感登徒言恩情遂中絕

齊賢曰此

篇梁括宋玉答楚王問及高唐登徒子好色賦事見前  
士贇曰此篇太白特借宋玉事以申己之意耳如後篇  
詠壁上鸚鵡亦此意也

寫懷

翰林讀書言懷呈集賢諸學士

長安

晨趨紫禁中夕待金門詔觀書散遺帙探古窮至妙片

言苟會心掩卷忽而笑青蠅易相點白雪難同調本是  
疎散人屢貽褊促誚雲天屬清朗林壑憶遊眺或時清  
風來閒倚欄下嘯嚴光桐廬溪謝客臨海嶠功成謝人  
間從此一投釣士贇曰帙書衣也毛詩箋青蠅能汙白  
使黑莊子陽春白雪其調高其和寡嚴  
光謝客事見前卷此太白寫心之  
作觀此則前效古一首槩可見矣

尋陽紫極宮感秋作

何處聞秋聲脩脩北窓竹迴薄萬古心攬之不盈掬靜  
坐觀衆妙浩然媚幽獨白雲南山來就我簷下宿嬾從

唐生決羞訪季主卜四十九年非一往不可復野情轉

蕭散世道有翻覆陶令歸去來田家酒應熟

齊賢曰唐生決疑事

見前史記司馬季主楚人卜於長安東市宋忠賈誼俱出洗沐遊於卜肆謁司馬季主淮南子蘧伯玉年五十而知四十九年非士賈曰太白雅尚冲澹是亦書懷之士也

### 江上秋懷

餐霞卧舊壑散髮謝遠遊山蟬號枯桑始復知天秋朔  
鴈別海裔越燕辭江樓颯颯風卷沙茫茫霧縈洲黃雲  
結暮色白水揚寒流惻愴心自悲潺湲淚難收蘅蘭方

蕭瑟長嘆令人愁

齊賢曰爾雅注杜蘅似葵而香士資曰漢書袁閎散髮絕世此太白傷已

之作也不惟傷已而復為同類者傷之悲夫

秋夕書懷

一作秋日南遊書懷

北風吹海鴈南渡落寒聲感此瀟湘客淒其流浪情海

懷結滄洲

一作遠心飛蒼梧

霞

一作返

想遊赤城始探蓬壺事

一作

術旋覺天地輕澹然吟

一作思

高秋閒卧瞻太清蘿月掩

一作隱

空幕松霜結

一作雲散

前楹滅見息羣動獵微窮至精

桃花有源水可以保吾生

齊賢曰天台山圓曰赤城山天台之南蓬壺蓬萊方壺也

士贇曰太白當謫逐之時乃能以  
仙遊自解可謂善處患難者矣

避地司空原言懷

舒州

南風昔不競豪聖思經綸劉琨與祖逖起舞雞鳴晨雖  
有匡濟心終為樂禍人我則異於是潛光皖水濱卜築

司空原北將天柱鄰雪霽萬里月雲開九江春

齊賢曰祖逖與

劉琨聞雞起舞事見前案宇記皖  
水在懷寧縣西北蕩縣有天柱山俟乎太階平然後託

微身傾家事金鼎年貌可長新所願得此道終然保清  
真弄景奔日馭攀星戲河津一隨王喬去長年玉天賓

齊賢曰太  
階事見前

上崔相百憂章

時在潯陽獄

共工赫怒天維中摧鯤鯨噴蕩揚濤起雷魚龍陷人成  
此禍胎火焚崑山玉石相礪仰希霖雨灑寶炎煨箭發  
石開戈揮日迴鄒衍慟哭燕霜颯來

齊賢曰列子曰共工氏與顓頊爭為

帝怒而觸不周之山折天柱絕地維書大炎崑岡玉石俱焚淮南子曰鄒衍盡忠於燕惠王王信譖而繫之鄒衍仰天而哭正微誠不感猶繫夏臺蒼鷹搏攫丹棘崔

夏天為之降霜  
鬼豪聖凋枯王風傷哀斯文未喪東岳豈頽穆逃楚難

鄒脫吳災見機苦遲二公所咤驥不驟進麟何來哉

賢齊

曰史記桀召湯而囚之夏臺已而釋之邳都為中尉嚴  
酷行法不避貴戚列侯宗室見都側目而視號曰蒼鷹  
豪聖周公也周公遭流言之變王道凋枯故幽以下諸  
詩哀傷之檀弓孔子歌曰太山其頽乎漢書楚元王少  
時嘗與魯穆生白生申公俱受詩於浮丘伯後以穆生  
白生申公為中大夫穆生不嗜酒元王每置酒嘗為設  
醴及王戊即位常設後忘設焉穆生退曰可以逝矣醴  
酒不設王之意怠不去楚人將鉗我於市稱疾卧申公  
白生強起之穆生曰易稱知幾其神乎君子見幾而作  
不俟終日遂謝病去申公白生獨留王戊稍淫暴二人  
諫不聽衣之赭衣使舂於市鄒陽齊人仕吳久之吳王  
陰有邪謀陽奏書諫王不納其言於是陽去之梁徙孝  
王遊士資曰說文星離一門草擲二孩萬憤結習憂從  
楚人謂相啗曰咤



中催金瑟玉壺盡為愁媒舉酒太息泣血盈杯台星再  
朗天網重恢屈法申恩棄瑕取材治長非罪尼父無猜  
覆盆儻舉應照寒灰齊賢曰天官書曰魁下六星兩兩  
相比者名曰三台老子天網恢恢  
疎而不漏孔子曰公治長  
雖在縲紲之中非其罪也

萬憤詞投魏郎中

海水渤潏人惟鯨鯢翁胡沙而四塞始滔天於燕齊何  
六龍之浩蕩遷白日於秦西九土星分替替栖栖南冠  
君子呼天而啼戀高堂而掩泣淚血地而成泥時當春

而不草獨幽怨而沈迷

齊賢曰左傳注鯨鯢大魚名以喻不義之人吞食小國齊之北

曰渤海燕之東曰遼海左傳晉侯曰南冠而縶者誰有司對曰鄭人所獻楚囚也使稅之問其族曰伶人也遂

操南音公語范文子曰楚囚君子也士賈曰時安祿山反范陽燕地故云翁胡沙而四塞曰君象時明皇方幸

蜀都故曰暹白曰日於兄九江兮第三峽悲羽化之難齊西秦高堂喻朝廷也

穆陵關北愁愛子豫章天南隔老妻一門骨肉散百草

遇難不復相提攜樹榛拔桂囚鸞寵難舜昔授禹伯成

耕犁德自此衰吾將安棲好我者恤我不好我者何忍

臨危而相擠子胥鴟夷彭越醢醢自古豪烈胡為此繫

蒼蒼之天高乎視低如其聽卑脫我牢狴儻辨美玉君

收白珪

齊賢曰九江三峽見前唐志沂州沂水縣有穆陵關洪州豫章郡南昌縣本豫章縣莊子曰堯

治天下伯成子高立為諸侯堯投舜禹伯成子高辭為諸侯而耕禹往見之疾趨就下風立而問曰堯治天下吾子立為諸侯堯投舜禹而吾子辭為諸侯而耕何也子高曰堯治天下不賞而民勸不罰而民畏今子賞罰而民且不仁德自此衰刑自此立後世之亂自此始矣夫子盍行邪耕而不顧子胥鴟夷事見前卷漢祖醢醢彭越以徧賜諸侯

荊州賊平臨洞庭言懷作

脩蛇橫洞庭吞象臨江島積骨成巴陵遺言聞楚老水

窮三苗國地窄三湘道歲晏天崢嶸時危人枯槁思歸

阻喪亂去國傷懷抱

齊賢曰唐岳州巴陵郡有象湖巴蛇吞象爆骨於此因以名湖寰宇

記羿殺巴蛇於洞庭其骨若陵故曰巴陵

郢路方丘墟章華亦傾倒風悲猿

嘯苦木落鴻飛早日隱西赤沙月明東城草闕河望已

絕氛霧行當掃長叫天可聞吾將問蒼昊

齊賢曰赤沙湖在洞庭西

通為沙湖

### 覽鏡書懷

得道無古今失道還衰老自笑鏡中人白髮如霜草捫

心空嘆息問影何枯槁桃李竟何言終成南山皓

齊賢曰捫

摸也南山皓即商山四皓

田園言懷

賈誼三年謫班超萬里侯何如牽白犢飲水對清流

齊賢

曰賈誼為長沙王太傅事見前班超扶風平陵人行詣相者相者指曰生燕頤虎頸飛而食肉此萬里侯相也後將本所從三十餘人平定西域五十餘國皆納質內屬明年下詔封超為定遠侯邑千戶

江南春懷

青春幾何時黃鳥鳴不歇天涯失鄉歸

一作

路江外老華

髮心飛秦塞雲影滯楚關月身世殊爛漫田園久蕪沒  
歲晏何所從長歌謝金闕

齊賢曰黃鳥黃鸝也士賢曰此太白流離湘楚之詩乎食

息不忘君其志亦可哀矣

# 詠物

## 聽蜀僧濬彈琴

蜀中

蜀僧抱綠綺西下峨眉峰為我一揮手如聽萬壑松客  
心洗流水餘響入霜鐘不覺碧山暮秋雲暗幾重

齊賢曰樂

書相如蔡琰之綠綺峨眉山見前卷列子伯牙鼓琴志  
在流水山海經豐山有九鐘是知霜鳴郭璞曰霜降則

鐘鳴故  
言知也

魯東門觀刈蒲

魯中

魯國寒事早初霜刈渚蒲揮鎌若轉月拂水生連珠此  
草最可珍何必貴龍鬚織作玉牀席欣承清夜娛罷衣  
能再拂不畏素塵蕪

士贇曰龍鬚草名此詩借蒲起興  
以自比也其有望君再用之意乎

白之志亦  
可哀矣

詠鄰女東牕海石榴

魯女東牕下海榴世所希珊瑚映綠水未足比光輝清

香隨風發落日好鳥歸願為東南枝低舉拂羅衣無由  
共攀折引領望金扉

齊賢曰新羅多海紅并海石榴西域傳大秦國西南距海八百里到

珊瑚洲底有盤石珊瑚生其上海人乘船沈鉄網水底發其根取之士贇曰此君子在野思見君子盡心事之

意之

### 南軒松

南軒有孤松柯葉自綿綿清風無閒時瀟洒終日夕陰  
生古苔綠色染秋煙碧何當凌雲霄直上數千尺

齊賢曰

覆也



詠山樽二首

前一首作詠柳  
少府山瘞木樽

蟠木不凋飾且將斤斧疎樽成山岳勢材是棟梁餘外  
與金罍並中涵玉醴虛慙君垂拂拭遂忝玳筵居

其二

擁腫寒山木嵌空成酒樽愧無江海量偃蹇在君門  
齊賢曰莊子惠子曰吾有大樹人謂之樗其大本擁腫而不中繩墨

初出金門尋王侍御不遇詠壁上鸚鵡

一作歸山

留別王侍御  
不遇詠鸚鵡

落羽辭金殿孤鳴咤綉衣能言終見棄還向隴西飛

齊賢

曰此太白自況也曲禮曰鸛鵒能言不離飛鳥

### 紫藤樹

紫藤掛雲木花蔓宜陽春密葉隱歌鳥香風留美人

齊賢

曰歌鳥見一卷

### 觀放白鷹二首

八月邊風高胡鷹白錦毛孤飛一片雪百里見秋毫

士賢

曰孟子曰明足以察秋毫之末

其二

寒冬十二月蒼鷹八九毛寄言燕雀莫相啁

陽握切

自有

雲霄萬里高

觀博平王志安少府山水粉圖

粉壁為空天丹青狀江海游雲不知歸日見白鷗在博  
平真人王志安沈吟至此願掛冠松溪石磴帶秋色愁  
客思歸坐曉寒

齊賢曰唐博平郡博平縣掛冠辭祿而去也

題雍丘崔明府丹竈

美人為政本忘機服藥求仙事不違葉縣已泥丹竈畢  
瀛洲當伴赤松歸先師有訣神將助大聖無心火自飛  
九轉但能生羽翼雙鳧忽去定何依

齊賢曰王喬為葉令有神術及赤松

事見  
前卷

### 觀元丹丘坐巫山屏風

昔遊三峽見巫山見畫巫山宛相似疑是天邊十二峰  
飛入君家綵屏裏寒松蕭颯如有聲陽臺微茫如有情  
錦衾瑤席何寂寂楚王神女徒盈盈高咫尺如千里翠

屏丹崖粲如綺蒼蒼遠樹圍荆門歷歷行舟泛巴水  
石潺湲萬壑分煙光草色俱氤氲溪花笑日何年發江  
客聽猿幾歲聞使人對此心緬邈疑入嵩高夢綵雲  
齊賢曰巫山三峡及陽臺神女事並見前南史景陵王子良傳貞字文煥善畫能於扇上圖山水咫尺之內便登高萬里為遙士贇曰緬邈長遠也

求崔山人百丈崖瀑布圖

百丈素崖裂四山丹壁開龍潭中噴射晝夜生風雷但  
見瀑泉落如瀑雲漢來聞君寫真圖崑崙嵬嵬紫迴石黛

刷幽草曾清澤古苔幽絨儻相傳何必向天台

齊賢曰說文瀑

飛泉也淥水會也又小水入大水本草曾清生蜀中山谷及越舊陶隱居云與空青同

### 見野草中有曰白頭翁者

醉入田家去行歌荒野中如何青草裏亦有白頭翁折

取對明鏡宛將衰鬢同微芳似相誚留恨向東風

齊賢曰本

草白頭翁一名野犬一名胡王使者一名奈何草生高山谷及野田陶隱居云處處有近根處有白茸狀似人白頭故以為名

### 流夜郎題葵葉

金史四庫全書  
卷二十四  
慙君能衛足嘆我遠移根  
白日如分照還歸守故園

齊賢

曰左傳鮑莊子之智不  
如葵葵猶能衛其足

### 瑩禪師房觀山海圖

真僧閉精宇滅跡含達觀  
列障圖雲山攢峰入霄漢  
丹崖森在目清晝疑卷幔  
蓬壺來軒牕瀛海入几案  
烟濤爭噴薄島嶼相凌亂  
征帆飄空中瀑水灑天半  
崢嶸若可陟想像徒盈嘆  
杳與真心冥遂諧靜者翫  
如登赤城裏揭步滄洲畔  
即事能娛人從茲得消散

白鷺鷥

白鷺下秋水孤飛如墜霜心閒且未去獨立沙洲傍

詠槿

園花笑芳年池草艷春色猶不如槿花嬋娟玉階側芬  
榮何天促零落在瞬息豈若瓊樹枝終歲長翕艷

士資曰槿

花朝華暮落一名日及一名薺華取一瞬之義

詠桂

世人種桃李皆在金張門攀折爭捷徑及此春風暄一



朝天霜下榮耀難久存安知南山桂綠葉垂芳根清陰  
亦可託何惜樹君園

白胡桃

紅羅袖裏分明現白玉盤中看却無疑是老僧休念誦  
腕前推下水晶珠

巫山枕障

巫山枕障畫高丘白帝城邊樹色秋朝雲夜入無行處

巴水橫天更不流

齊賢曰全篇  
事並見前註

南奔書懷

遙夜何漫漫空歌白石爛寧戚未匡齊陳平終佐漢攬

搶掃河洛直割鴻溝半歷數方未遷雲雷屢多難齊賢曰寧

戚歌見前卷陳平家貧好讀書有田三十畝獨與兄伯

居伯常耕作縱平使遊學仕魏王咎為太僕人或讒之

平亡去因魏無知求見漢王漢王與語悅之拜為都尉

掃河洛謂祿山反據洛陽也史記項王與漢約中分天

下割鴻溝以西為天人秉旄鉞虎竹光藩翰倚筆黃金

漢鴻溝以東為楚

臺傳觴青玉案不因秋風起自有思歸嘆主將動讒疑

王師忽離叛自來白沙上

一作兵羅鼓譟丹陽岸賓御

滄海上

李太白集分類補註

二十五

次定日集全書

如浮雲從風各消散

齊賢曰天人指永王璘張翰因秋風起思舊鱸事見前宣州當塗縣

貞觀八年省丹陽縣入馬縣有丹陽湖

舟中指可掬城上骸爭爨草草出

近關行行昧前算南奔劇星火北寇無涯畔顧乏七寶

鞭留連道傍翫太白夜食昴長虹日中貫秦趙興天兵

茫茫九州亂感遇明主恩頗高祖遜言過江誓流水志

在清中原拔劍擊前柱悲歌難重論

齊賢曰左傳邲之戰楚乘晉軍桓子

不知所為鼓於軍中曰先濟者有賞中軍下軍爭舟舟中之指可掬也又楚人圍宋將去申叔時僕曰蔡室反耕者宋必聽命從之宋人懼使華元夜入楚師登子反之牀起之曰敝邑易于而食析骸而爨雖然城下之盟

有以國斃不能從也晉王敦鎮姑熟將舉兵內向明帝  
密知之乃乘巴滇駿馬微行至湖陰察其營壘而出敦  
晝寢夢日環其城起曰此必黃鬚鮮卑奴來也使五騎  
物色追帝帝亦馳去馬有遺糞輒以水灌之見逆旅賣  
食媼以七寶鞭與之曰後有騎來可以此示也俄而追  
者至問媼媼曰去已遠矣因以鞭示之五騎傳訖稽留  
遂久又見馬糞冷以為信遠而止不追蘇林曰秦白起  
伐趙破長平軍欲遂滅趙遣衛先生說昭王益兵糧為  
應侯所害事用不成其精誠上達於天故太白為之食  
昂昂趙分將有兵故太白食食者干歷之也荆軻白虹  
貫日漢臣拔劍擊柱及祖逖志清中原事並見前卷士  
賁曰按此篇用事偏枯句意倒雜決非太白之作姑存  
而置諸卷末以俟心知其意者

李太白集分類補註卷二十四

謹案卷二十三第八頁前七行唐蓬山郡治蓬池  
縣刊本蓬山上衍蓬池二字今改

第十頁前五行而入涅槃刊本槃訛繫今改

第十頁後二行撥雲尋古道刊本撥訛拔據全唐  
詩改

第十二頁後一行回首意何如刊本何如訛如何  
據全唐詩改

第十二頁後五行天書訪江海刊本江訛注據繆

曰芑本改

第十三頁前七行遺吾孔子琴撫之潛然刊本琴  
字訛在撫字下據全唐詩改

卷二十四第三頁前八行而不肯以身輕許于人  
刊本肯訛肖今改

第五頁後三行身沒期不朽刊本期訛豈據文苑  
英華及唐文粹改

第七頁後六行宛轉入宵夢刊本宵夢訛夢宵據

全唐詩改

第十頁後六行天子負斧宸南向而立刊本脫斧  
字南向訛作正南面據禮記明堂位改

第十一頁後二行從風欲傾倒刊本從訛清據全  
唐詩改

第十七頁前二行南冠而縶者誰刊本縶訛泣據  
左傳改

第十七頁後三行疾趨就下風刊本就訛隴據莊子改




第二十頁後六行其大本擁腫而不中繩墨刊本  
句下衍規矩二字據莊子刪

第二十頁後八行留別王侍御刊本王訛陸據全  
唐詩及繆曰芑本改

第二十三頁後二行鮑莊子之智不如葵刊本鮑  
訛趙之訛曰不訛而並據左傳改

第二十四頁前三行詠槿刊本槿下衍二首兩字  
下詠桂詩訛作其二據全唐詩改





總校官候補中書臣吳紹潔

校對官中書臣王家賓

謄錄監生臣章玉植

謄錄監生臣李敦源

欽定四庫全書

集部

李太白集分類補註卷二十五

六

詳校官助教臣常循



李太白集分類補註卷二十五

宋 楊濟賢 集註

元 蕭士贇 補註

題

題隨州紫陽先生壁

神農好長生風俗久已成復聞紫陽客早署丹臺名喘  
息食妙氣步虛吟真聲道與古仙合心將元化并樓疑



出蓬海鶴似飛玉京松雪牕外曉池水階下明忽耽筌

歌樂頗失軒冕情終願惠金液提携凌太清

齊賢曰抱朴子曰金

液太一所服而仙者太清

天也蓬海玉京山見前

### 題元丹丘山居

故人棲東山自愛丘壑美青春卧空林白日猶不起松  
風清襟袖石潭洗心耳人老無紛喧高枕碧霞裏

### 題元丹丘潁陽山居

并序

丹丘家于潁陽新卜別業其地北倚馬嶺連峯嵩

立南瞻鹿臺極目汝海雲巖映鬱有佳致焉白從  
之遊故有此作

仙遊渡潁水訪隱同元君忽遺蒼生望獨與洪崖群卜  
地初晦跡興言且成文却顧北山斷前瞻南嶺分遙通  
汝海月不隔嵩丘雲之子合逸趣而我欽清芬舉跡倚  
松石談笑迷朝曛益願狎青鳥拂衣棲江濱

齊賢曰潁水洪崖見

前

題瓜州新河餞族叔舍人賁

齊公鑿新河萬古流不絕豐功利生人天地同朽滅兩  
橋對雙閣芳樹有行列愛此如甘棠誰云敢攀折吳關  
倚此固天險自茲設海水落斗門潮平見沙汭我行送  
季父弭棹徒流悅楊花滿江來疑是龍山雪惜此林下  
興愴與山陽別瞻望清路塵歸來空寂滅士贊曰毛詩  
甘棠勿剪勿伐召伯所蒞

洗脚亭

白道向姑熟洪亭臨道傍前有昔時井下有五丈牀樵

女洗素足行人歇金裝西望白鷺洲  
蘆花似朝霜送君此時去回首淚成行

一作雙

### 勞勞亭

天下傷心處勞勞送客亭春風知別苦不遣柳條青

齊賢

曰輿地志秣陵縣新亭隴有勞勞樓宋改為臨滄觀行人分別之所

### 題金陵王處士水亭

此亭齊朝南苑又晉陸機故宅

王子耽玄言賢豪多在門好鵝尋道士愛竹嘯名園樹

色老

一作秀

荒苑池光蕩華軒此堂見明月更憶陸平原



金安四卷之三  
卷二十五  
掃拭青玉簫為余置金樽醉罷

一作後

欲歸去花枝宿鳥

喧何時復來此再得洗囂煩

齊賢曰好鵝愛竹事見前平原陸機也事亦見前

題嵩山逸人元丹丘山居

并序

白久在廬霍元公近遊嵩山故交深情出處無間  
屈信頻及許為主人欣然適會本意當冀長往不  
返欲便舉家就之兼書共遊因有此贈

家本紫雲山道風未淪落沉懷丹丘志冲賞歸寂寞  
來遊閩荒捫涉窮禹鑿黃緣泛潮海偃蹇陟廬霍憑雷

躡天牕弄影憩霞閣且欣登眺美頗愜隱淪諾

齊賢曰唐閩州

長樂

郡開元十三年更名福州治閩縣即西漢閩粵王

閩中郡之地頻海荒服故曰閩荒廬山隸江州霍山即

舒之鎮桓子新論天下神人五二曰隱

三山曠幽期四

淪士贊曰水經砥柱山禹鑿以通河

岳聊所託故人契嵩穎高義炳丹臚滅跡遺紛囂終言

本峯壑自矜林端好不羨朝市樂偶與真意并頓覺世

情薄爾能折芳桂吾亦採蘭若拙妻好采鸞嬌女愛飛

鶴提携訪神仙從此鍊金藥

齊賢曰三山三神山也四岳恒華泰衡也

題江夏脩靜寺

此寺是李北海舊宅

我家北海宅作寺南江濱空庭無玉樹高殿坐幽人書

帶留青草琴堂

一作臺

幕素塵平生種桃李寂滅不成春

齊賢曰李邕為北海太守天寶中為吉溫所陷而殺之於郡代宗贈秘書監國史異纂雲陽界多漢離宮故地有樹似槐而細葉土人謂之玉樹三齊記鄭康成常居南山中教授山下草如薤葉長尺許時人名為書帶草

改九子山為九華山聯句

并序

青陽縣南有九子山山高數千丈上有九峯如蓮  
花按圖徵名無所依據太史公南遊畧而不書事  
絕古老之口復闕名賢之紀雖靈仙往復而賦詠

罕聞予乃削其舊號加以九華之目時訪道江漢  
憩於夏侯迴之堂開簷岸幘坐眺松雪因與二三  
子聯句傳之將來

妙有分二氣靈山開九華

李白

層標遏遲日半壁明朝霞

高霽積雪曜陰壑飛流散陽崖

韋權輿曜一作瑾

青瑩玉樹色縹

緲羽人家

李白士贇曰老子云道生一王弼注曰一數之始而物之極也謂之為妙有者欲言有不

見其形則非有故謂之妙欲言其無則物由以生則非無故謂之有也斯乃無中之有謂之妙有也銑曰青瑩也

題宛溪館

吾憐宛溪好百尺照心明

一作久照心益明

可謝新安水千尋

見底清白沙留月色綠竹助秋聲却笑嚴湍上于今獨

擅名

齊賢曰宛陵隸宣州嚴湍見前

題東谿公幽居

杜陵賢人清且廉東谿卜築歲將淹宅近青山同謝朓

門垂碧柳似陶潛好鳥迎春歌後院飛花送酒舞前簷

客到但知留一醉盤中祇有水晶鹽

齊賢曰太白傳曰晚好黃老渡牛渚

磯至姑熟悅謝家青山欲居焉故云宅近青山  
陶潛門前有五柳因作五柳先生傳以自況

# 雜詠

## 嘲魯儒

魯叟談五經白髮死章句問以經濟策茫如墜煙霧足  
著遠遊履首戴方山中緩步從直道未行先起塵秦家  
丞相府不重褰衣人君非叔孫通與我本殊倫時事且  
未達歸耕汶水濱

齊賢曰後漢志方山冠似進賢以五綵縠為之秦紀丞相斯請史官非秦

記皆燒之非博士官所職天下敢有藏詩書百家語者悉詣守尉雜燒之士皆曰叟長老之通稱叔孫通起朝

儀徵魯諸生三十餘人魯有兩生不肯行通笑曰若真鄙儒不通時變

懼讒

二桃殺三士詎假劍如霜衆女妬娥眉雙花競春芳魏  
姝信鄭襄掩袂對懷王一惑巧言子朱顏成死一作傷

行將泣團扇戚戚愁人腸

齊賢曰戰國策魏王遺楚王美人楚王悅之夫人鄭襄知

王之悅新人也甚愛新人衣服玩好擇其所喜而為之愛之甚于王王曰婦人之所以事夫者色也而妬者其情也今鄭襄知寡人之悅新人其愛之甚於寡人此忠臣之所以事君也鄭襄知王以已為不如也因謂新人曰王愛子美矣雖然惡子之鼻子見王則必掩子鼻新人見王因掩其鼻王謂鄭襄曰何也襄曰其以聞君王

之臭也王曰悍哉令剿之無使逆命成帝初即位班婕妤選入宮為婕妤好後幸趙飛燕婕妤好失寵擬古怨歌行曰裁成合歡扇團圓似明月棄捐篋笥中恩情中道絕士贇曰二桃殺三士見前卷

### 觀獵

太守耀清威乘間弄晚暉江沙橫獵騎山火遶行圍箭逐雲鴻落鷹隨月兔飛不知白日暮歡賞夜方歸

### 觀胡人吹笛

胡人吹玉笛一半是秦聲十月吳山曉梅花落敬亭愁聞出塞曲淚滿逐臣纓却望長安道空懷戀主情

齊賢曰李



斯云擊甕叩缶彈箏搏箏而呼烏鳥快耳者真秦聲也  
敬亭山見前落梅花羌笛曲也張博望傳其法於西涼  
得摩訶兜勒一曲李延年因之更造新聲二十八解乘  
輿以為武樂當給邊將魏晉以後二十八解不存所用  
者惟黃鶴隴頭水出關入關出塞入塞折楊柳黃華子  
赤之楊望行人等十曲也士贇曰太白放逐之餘眷戀  
宗國之意隨寓而發觀此詩末三句槩可見矣

# 軍行

騶馬新跨

一作誇

白玉鞍戰罷沙場月色寒城頭鐵鼓聲

猶震匣裏金刀血未乾

齊賢曰毛詩註赤身黑鬣曰騶

# 從軍行

百戰沙場碎鐵衣城南已合數重圍突營射殺呼延將

獨領殘兵千騎歸

齊賢曰薛收曰匈奴署各種單于有王號者十六等左右賢王四姓曰呼

延氏十氏蘭氏喬氏呼延號曰逐世為輔相

### 平虜將軍妻

平虜將軍婦入門二十年君心自不悅妾寵豈能專出  
解牀前帳行吟道上篇古人不唾井莫忘昔纏綿

### 春夜洛城聞笛

誰家玉笛暗飛聲散入春風滿洛城此夜曲中聞折柳

何人不起故園情

齊賢曰折楊柳曲名

嵩山採菖蒲者

神仙多古貌雙耳下垂肩嵩嶽逢漢武疑是九疑仙我  
來採菖蒲服食可延年言終忽不見滅影入雲煙喻帝

竟莫悟終歸茂陵田

齊賢曰此篇是詠仙人王興詩語乃隱括其傳中事神仙傳王興者

城陽人居壺谷中不知書無學道意漢武上嵩山登大  
愚石起道宮使董仲舒東方朔徐樂思神至夜半忽有  
仙人長二丈耳出頭巔下至肩漢武禮而問之仙人曰  
吾九疑之神聞中嶽石上菖蒲一寸九節可以服之長  
生故來採耳忽失所在帝顧侍臣曰彼非復學道服食  
者必中嶽之神以喻朕耳為之採菖蒲服之經三年帝

覺悶而不快遂止時從官多服然莫能持久惟王興聞  
仙人告武帝服乃採服之不息遂得長生武帝葬茂陵

### 金陵聽韓侍御吹笛

韓公吹玉笛個儻流英音風吹繞鍾山萬壑皆龍吟王

子停鳳管師襄掩瑤琴餘韻度江去天涯安可尋

齊賢曰長

笛賦龍吟水中不見已截竹吹之聲相似王子晉吹笙作鳳鳴士贇曰家語孔子學琴於師襄子襄子曰吾雖擊磬以為官然能於琴

### 流夜郎聞酺不預

北闕聖人歌太康南冠君子竄遐荒漢酺聞奏鈞天樂

願得風吹到夜郎

齊賢曰光武紀大酺注漢律三人以上羣飲罰金四兩今賜得令聚會飲

五日酺布也士贊曰鉤天廣樂南冠君子見前

### 放後遇恩不霑

天作雲與雷霈然德澤開東風日本至白雉越裳來獨

棄長沙國三年未許回何時入宣室更問洛陽才

齊賢曰易

雲雷屯君子以經綸周公相成王越裳氏重譯獻白雉史賈誼為長沙王太傅歲餘徵見文帝受釐坐宣室因感鬼神事而問鬼神之本

### 宣城見杜鵑花

蜀國曾聞子規鳥宣城還見杜鵑花一叫一迴腸一斷

三春三月憶三巴

齊賢曰成都記杜宇自天而降稱望帝好稼穡勸人務農至今蜀人將農

必先祠杜宇又望帝死其魂化為鳥名曰杜鵑亦曰子規時適三月子規鳥鳴故蜀人悲子規鳥潤州鶴林寺杜鵑花高丈餘今江南處處有之俗名映山紅

### 白田馬上聞鶯

黃鸝啄紫椹五月鳴桑枝我行不記日誤作陽春時  
老客未歸白田已綠絲驅馬又前去捫心空自悲

悲一作嗤

### 三五七言

秋風清秋月明落葉聚還散寒鴉棲復驚相思相見知  
何日此時此夜難為情

齊賢曰古無此  
體自太白始

雜詩

白日與明月晝夜尚

一作常

不閒况爾悠悠人安得久世

間傳聞海水上乃有蓬萊山玉樹生綠葉靈仙每登攀

一食駐玄髮再食留紅顏吾欲從此去去之無時還

齊賢

曰蓬萊玉  
樹見前卷

閨情

寄遠十二首

三鳥別王母銜書來見過斷腸若剪絃其如愁思何遙  
知玉牕裏纖手弄雲和奏曲有深意青松交女蘿寫水  
落井中同泉豈殊波秦心與楚恨皎皎為誰多齊賢曰三青鳥  
王母使也事見前樂書曰自古善琴者八十餘家一十  
八樣究之雅度不過伏羲犧大舜夫子靈闕雲和五等而  
已

其二

青樓何所在乃在碧雲中寶鏡掛秋水

一作月

羅衣輕春



風新粧坐落日悵望金

一作錦

屏空念此

一作剪綵

送短書願

因雙飛鴻

其三

本作一行書慙勤道相憶一行復一行滿紙情何極瑤

臺有黃鶴為報青樓人朱顏凋落盡白髮一何新自知

未應還離居

一作君

經三春桃李今若為當牕發光彩莫

使香風飄留與紅芳待

齊賢曰瑤臺青樓見前

其四

玉筯落春鏡坐愁湖陽水聞與陰麗華風煙接鄰里青  
春已復過白日忽相催但恐荷花晚令人意已摧相思  
不惜夢日夜向陽臺齊賢曰玉筯淚也湖陽後漢南陽郡光武陰皇后諱麗華南陽新野人初光武適新野聞后美心悅之嘆曰娶妻當得陰麗華巫山陽臺事見前

其五

遠憶巫山陽花明淥江暖躊躇未得往淚向南雲滿春  
風復無情吹我夢魂斷不見眼中人天長音信短

其六

陽臺隔楚水春草生黃河

一作陰雲隔楚水轉蓬落渭河

相思無日夜

浩蕩若流波流波向海去欲見終無因

一作定饒珠江濱

遙將

一點淚遠寄如花人

其七

妾在春陵東君居漢江島一日望花光往來成白道

一作

日日采蘿無上山成白道

一為雲雨別此地生秋草秋草秋蛾飛相

思愁落暉何由一相見滅燭解羅衣

一本暉下云昔時携手去今時流淚

歸遙知不得意玉筍點羅衣齊賢曰春陵漢江見前

其八

憶昨東園桃李紅，碧枝與君此時初別離。  
金瓶落井無消息，令人行歎復坐思。  
坐思行嘆成楚越，春風玉顏畏銷歇。  
碧牕紛紛下落花，青樓寂寂空明月。  
兩不見，但相思。空留錦字表心素，至今緘愁不忍窺。

其九

長短春草綠，緣階如有情。  
卷施心獨苦，抽却死還生。  
覩物知妾意，希君種後庭。  
閒時當採掇，念此莫相輕。

齊賢曰：卷

施即本草藁  
耳注曰蒼耳

其十

魯縞如玉霜筆題月氏書寄書白鸚鵡西海慰離居行  
數雖不多字字有委曲天末如見之開絨淚相續淚盡  
恨轉深千里同此心相思千萬里一書直千金

一作云  
千里若

在眼萬里若在心齊賢曰師古曰縞素  
也曲阜善作尤為輕細月氏西域國名

其十一

美人在時花滿堂美人去後餘空牀牀中繡被卷

一作  
更不

卷不寢至今三載聞餘香一作猶香亦竟不滅人亦竟

不來相思黃葉落白露濕青苔

士贊曰古詩  
空林難獨守

其十二

愛君芙蓉嬋娟之艷色色可食兮難再得憐君冰玉清  
迥之明心情不極兮意已深朝共琅玕之綺食夜同鴛  
鴦之錦衾恩情婉孌忽為別使人莫錯亂愁心亂愁心  
涕如雪寒燈厭夢魂欲絕覺來相思生白髮盈盈漢水  
若可越可惜凌波步羅襪美人美人兮歸去來莫作朝

雲暮雨兮飛陽臺

齊賢曰琅玕玉也士贇曰陸機詩註曰婉孌存思貌

長信宮

月皎昭陽殿霜清長信宮天行乘玉輦飛燕與君同更

有歡娛處

一作別有留情處

承恩樂未窮誰憐團扇妾獨坐怨

秋風

齊賢曰漢書孝成趙皇后弟絕幸為昭儀居昭陽舍梁皇后傳註漢儀帝祖母稱長信宮飛燕事見

前

長門怨二首

天迴北斗挂西樓金屋無人螢火流月光欲到長門殿

別作深宮一段愁

士贊曰詩箋云螢火家無人則然令  
人感思室中久無人故有此物是不

足畏乃可  
以為憂

## 其二

桂殿長愁不記春黃金四屋起秋塵夜懸明鏡青天上

獨照長門宮裏人

士贊曰此詩皆隱括漢武陳皇后事  
以比玄宗皇后其意微而婉矣事見

前卷

註

## 春怨

白馬金羈遼海東羅帷綉被卧春風落月低軒窺燭盡



飛花入戶笑床空

代贈遠

妾本洛陽人，狂夫幽燕客。  
渴飲易水波，由来多感激。  
胡馬西北馳，香駿搖綠絲。  
鳴鞭從此去，逐虜蕩邊陲。  
昔去有好奇，言不言久離。  
別燕支多美女，走馬輕風雪。  
見此不記人，恩情雲雨絕。  
啼流玉筋盡，坐恨金閨切。  
織錦作短書，腸隨回文結。  
相思欲有寄，恐君不見察。  
焚之揚其灰，手跡自此滅。

齊賢曰：竇滔為苻堅秦州刺史，被徙流沙。妻蘇若蘭織錦回文旋圖詩以贈滔。宛轉

循環讀之詞甚悽  
惋凡八百四十字

陌上贈美人

一云小放歌行一首  
在第三此是第二篇

駿馬驕行踏落花  
垂鞭直拂五雲車  
美人一笑褰珠箔  
遙指紅樓是妾家

閨情

流水去絕國  
浮雲辭故關  
水或戀前浦  
雲猶歸舊山  
恨君流沙去  
棄妾漁陽間  
玉筯夜垂流  
雙雙落朱顏  
黃鳥坐相悲  
綠楊誰更攀  
織錦心草草  
挑燈淚斑斑  
窺鏡不

自識況乃狂夫還

士贇曰此篇是詠竇滔妻蘇氏若蘭錦織作回文詩寄夫事詳見前詩

代別情人

清水本不動桃花發岸傍桃花弄水色波蕩搖春光我  
悅子容艷子傾我文章風吹綠琴去曲度紫鴛鴦昔作  
一水魚今成兩枝鳥哀哀長雞鳴夜夜達五曉起折相  
思樹歸贈知寸心覆水不可收行雲難重尋天涯有度  
鳥莫絕瑤華音

齊賢曰吳都賦南榴之木相思樹也

代秋情

幾日相別離門前生櫓葵寒蟬聒梧桐日夕長鳴悲白  
露濕螢火清霜凌兔絲空掩紫羅袂一作空閨掩羅袂長啼無  
盡時齊賢曰櫓自生稻鳧葵生水中小葉狀似藜有毛抱朴子曰兔絲草下有伏兔之  
根無此兔則絲不生於上

### 對酒

蒲萄酒金叵音頗羅吳姬十五細馬馱青黛畫眉紅錦靴  
道字不正嬌唱歌玳瑁筵中懷裏醉芙蓉帳裏一作底奈

君何

怨情

新人如花雖可寵故人似玉由來重  
花性飄揚不自持  
玉心皎潔終不移故人昔新今尚故  
還見新人有故時  
請看陳后黃金屋  
寂寂珠簾生網絲  
齊賢曰金屋貯阿嬌事見前

湖邊採蓮婦

小姑織白紵未解將人語  
大嫂採芙蓉溪湖千萬重  
長兄行不在莫使外人逢  
願學秋胡婦貞心比古松  
齊賢曰爾

雅女子謂兄之妻為嫂  
士贊曰秋胡事見前

怨情

美人捲珠簾深坐顰娥眉但見淚痕濕不知心恨誰

代寄情楚詞體

君不來兮徒蓄怨積思而孤吟雲陽一去已遠隔巫山  
綠水之沉沉留餘香兮染綉被夜欲寢兮愁人心朝馳  
余馬於青樓恍若空而夷猶浮雲深兮不得語却惆悵  
而懷憂使青鳥兮銜書恨獨宿兮傷離居何無情而兩  
絕夢雖往而交疎橫流涕而長嗟折芳洲之瑤華送飛

鳥以極目怨夕陽之西斜願為連根同死之秋草不作

飛空之落花

齊賢曰巫山青鳥見前

學古思邊

銜悲上隴首腸斷不見君流水若有情幽哀從此分蒼  
茫愁邊色惆悵落日曛山外接遠天天際復有雲白鴈  
從中來飛鳴苦難聞足繫一書札寄言難離羣離羣心  
斷絕十見花成雪胡地無春暉征人行不歸相思杳如  
夢珠淚濕羅衣

齊賢曰蘇武傳天子射上林得鴈足有繫帛書隴水事見前

思邊一作春怨

去年何時君別妾南園綠草飛蝴蝶  
今歲何時妾憶君西山白雪暗秦雲  
玉闕去此三千里欲寄音書那可聞

齊賢曰玉  
關事見前

口號吳王美人半醉

風動荷花水殿香  
姑蘇臺上宴吳王  
西施醉舞嬌無力

笑倚東牕白玉牀

齊賢曰全篇  
事見前卷

折荷有贈

此與擬古詩內第十一  
首數字不同故兩存之



涉江翫秋水愛此紅蕖鮮攀荷弄其珠蕩漾不成圓佳  
人綵雲裏欲贈隔遠天相思無因見惆悵涼風前

代美人愁鏡二首

明明金鵲鏡了了玉臺前拂拭交冰月光輝何清圓紅  
顏老昨日白髮多去年鉛粉坐相誤照來空悽然齊賢曰神  
異經有夫婦相別破鏡人各執半以為信其妻與人  
通鏡化為鵲飛至夫前夫乃知之後人因鑄鏡為鵲

其二

美人贈此盤龍之寶鏡燭我金縷之羅衣時將紅袖拂

明月為惜普照之餘輝影中金鵲飛不滅臺下青鸞思  
獨絕橐砧一別若箭弦去有日來無年狂風吹却妾心  
斷玉筋并墮菱花前齊賢曰唐記云天寶三載五月初五日揚州進水心鏡一面縱橫九寸青瑩耀日背有盤龍長三尺四寸五分勢如生動玄宗異之進鏡官揚州參軍李才泰曰鑄鏡時有老人自稱曰龍名護有小童名玄冥至謂鏡匠呂暉曰老人解造真龍欲為制之遂令玄冥入爐扇閉戶牖三日夜門開呂暉等搜覓已失所在鏡爐前獲書曰盤龍盤龍隱於鏡中分時有象變化無窮興雲吐霧行雨生風玉筋淚也菱花鏡也

### 贈段七娘

羅襪凌波生網塵那能得計訪情親  
千杯綠酒何辭醉  
一面紅妝惱殺人

別內赴徵三首

王命三徵去未還明朝離別出吳關  
白玉高樓看不見  
相思須上望夫山

齊賢曰姑熟望夫山見前

其二

出門妻子強牽衣問我西行幾日歸  
歸時倘佩黃金印

莫學蘇秦不下機

齊賢曰蘇秦妻不下機事見前

其三

翡翠為樓金作梯誰人獨宿倚門啼  
夜坐寒燈連曉月  
行行淚盡楚關西

齊賢曰楚關西即武關在楚西界者

秋浦寄內

我今尋陽去辭家千里餘  
結荷倦水宿却寄大雷書  
雖不同辛苦愴離各自居  
我自入秋浦三年北信疎  
紅顏愁落日白髮不能除  
有客自梁苑手携五色魚  
開魚得錦字歸問我何如  
江山雖道阻意合不為殊

齊賢曰尋陽郡志大

雷口去舒州望江縣三十里秋浦梁苑魚錦字並見前  
士贇曰大雷書是書鮑照登大雷岸與妹書事按晉書  
曰吾自發寒雨全行日少加秋潦浩汗山溪漲至度汴  
無邊險徑遊棧石星飯結荷衣水宿旅食貧辛波略壯  
闊始以今日食時僅及大雷塗登千里日踰十  
晨嚴霜慘節悲風斷肌去親為客如何如何

自代內贈

寶刀裁流水無有斷絕時妾意逐君行纏綿亦如之別  
來門前草秋蒼春轉碧掃盡更還生萋萋滿行跡鳴鳳  
始相得雄驚雌各飛遊雲落何山一往不見歸估客發  
大樓知君在秋浦梁苑空錦衾陽臺夢行雨妾家三作

相失勢去西秦猶存舊歌管淒清聞四鄰曲度入紫雲  
啼無眼中人妾似井底桃開花向誰笑君如天上月不  
肯一迴照窺鏡不自識別多憔悴深安得秦吉了為人  
道寸心

此太白自道也齊賢曰大樓山隸宣城秋浦梁苑陽臺行雨曲度入紫雲事並見前秦吉了出

邕及占城即結遼鳥能言勝於鸚鵡黑色兩眉獨黃

### 秋浦感主人歸燕寄內

霜凋楚關木始知殺氣嚴寥寥金天廓婉婉綠紅潛胡  
燕別主人雙雙語前簷三飛四迴顧欲去復相瞻豈不

戀華屋終然謝珠簾我不及此鳥遠行歲已淹寄書道  
中嘆淚下不能緘齊賢曰陽廣記曰胡燕習斑聲小珠簾見前士贊曰月令仲秋之月殺氣浸盛孟秋之月其帝少皞註曰少皞金天氏

送內尋廬山女道士李騰空二首

君尋騰空子應到碧山家水春雲母碓風掃石楠花若

戀幽居好相邀弄紫霞齊賢曰本草雲母久服輕身延年生泰山山谷石楠生華陰山

谷葉狀如枇杷

其二

多君相門女學道愛神仙素手掬青靄羅衣曳紫煙一

往屏風疊乘鸞着玉鞭

一本作不着鞭

### 贈內

三百六十日日日醉如泥雖為李白婦何異太常妻

齊賢

曰後漢周澤為太常卧病齋宮其妻哀澤老病窺問所苦澤大怒以為干犯齋禁收送詔獄時人語曰生世不諧作太常妻一年三百六十日三百五十九日齋一日不齋醉如泥

### 在潯陽非所寄內

聞難知慟哭行啼入府中多君同蔡琰流淚請曹公知



登吳章嶺昔與死無分崎嶇行石道外折入青雲相見

若悲歎哀聲那可聞

齊賢曰蔡琰再嫁董祀時為曹操屯田都尉犯法當死文姬詣操請

之時公卿名士滿堂操曰蔡伯喈女在外今為諸公見之及進蓬首徒行叩頭請罪音辭清辯旨甚酸哀公曰文狀已去奈何姬曰公廐馬萬匹虎士成林何惜疾足一騎而不濟垂死之命乎公感其言追原祀罪

南流夜郎寄內

夜郎天外怨離居明月樓中音信疎北鴈春歸看欲盡  
南來不得豫章書

越女詞五首

長干吳兒女眉目艷星月  
履上足如霜不着鴉頭襪  
賢齊

曰長干見前士贇曰莊  
子云眉目顏色之好

## 其二

吳兒多白晢好為蕩舟劇  
賣眼擲春心折花調行客  
賢齊

曰毛詩註  
皙白色也

## 其三

耶溪採蓮女見客棹歌迴  
笑入荷花去佯羞不出來  
賢齊

曰越州若耶溪徐  
浩改為五雲溪

其四

東陽素足女會稽素舸郎相看月未墮白地斷肝腸

齊賢

曰唐娑州東山郡越州會稽郡

其五

鏡湖水如月耶溪女如雪新妝蕩新波光景兩奇絕

齊賢

曰明皇賜賀知章鏡湖剡溪一曲

浣紗石上女

玉面耶溪女青娥紅粉妝一雙金齒屐兩足白如霜

示金陵子

一作金陵子詞

金陵城東誰家子竊聽琴聲碧牕裏落花一片天上来  
隨人直度西江水楚歌吳語嬌不成似能未能最有情

謝公正要東山妓携手林泉處處行

齊賢曰漢書註師古曰楚歌者為楚

人歌猶言吳歌越吟

出妓金陵子呈盧六四首

安石東山三十春傲然携妓出風塵樓中見我金陵子

何似陽臺雲雨人

士贇曰事並見前

其二

南國新豐酒東山小妓歌對君君不樂花月奈愁何

士贊

曰事並  
見前

其三

東道煙霞主西江詩酒筵相逢不覺醉日墮歷陽川

其四

小妓金陵歌楚聲家僮丹砂學鳳鳴我亦為君飲清酒  
君心不肯向人傾

巴女詞

巴水急如箭巴船去若飛十月三千里郎行幾歲歸

哀傷

哭晁卿衡

日本晁卿辭帝都征帆一片繞蓬壺明月不歸沉碧海

白雲愁色滿蒼梧

士贇曰日本國蓬壺碧海蒼梧白雲等事並見前

自溧水道哭王炎三首

宣州

白楊雙行行白馬悲路傍晨興見曉月更似發雲陽溧

水通吳關逝川去未央故人萬化盡閉骨茅山岡天上  
墜玉棺泉中掩龍章名飛日月上義與風雲翔逸氣竟  
莫展英圖俄天傷楚國一老人來嗟龔勝亡有言不可  
道雪泣憶蘭芳

齊賢曰雲陽溧水吳關未央宮茅山玉棺事並見前晉書嵇康身長七尺八寸

美詞氣有風儀不自藻飾人以為龍章鳳姿天質自然  
漢書龔勝死時年七十九有老父來弔哭甚哀哀既而  
曰嗟乎薰以香自燒膏以明自銷龔生竟  
天天年非吾徒也遂趨而出莫知其誰

其二

王公希代寶棄世一何早弔死不及哀殯宮已秋草悲

來欲脫劍挂向何枝好哭向茅山雖未摧一生淚盡丹

陽道

齊賢曰左傳贈死不及尸弔生不及哀士贊曰季札挂劍徐君墓丹陽茅山事並見前

其三

王家碧瑤樹一樹忽先摧海內故人泣天涯弔鶴來未

成霖雨用先失濟川材一罷廣陵散鳴琴更不開

齊賢曰世

說王戎云太尉神姿高徹如瑤林瓊樹自然是風塵表物太尉王衍也陶侃母死有二客來弔不哭而退化為雙鶴冲天而去說命曰若歲大旱用汝作霖雨若濟巨川用汝作舟楫嵇康臨刑曰廣陵散於茲絕矣

哭宣城善釀紀叟



紀叟黃泉裏還應釀老春夜臺無曉日沽酒與何人一作

題戴老酒店云戴老黃泉下還應  
醉大春夜臺無李白沽酒與何人

宣城哭蔣徵君華

敬亭埋玉樹知是蔣徵君安得相如草空餘封禪文池

臺空有月詞賦舊凌雲獨挂延陵劍千秋在古墳齊賢曰敬

亭山隸宣城漢書相如病甚天子使使往取書相如已  
死家無遺書問其妻曰長卿未嘗有書也時時著書人  
又取去長卿未死時為一卷書曰有使來求書奏之其  
遺札言封禪事使者奏焉天子異之相如奏大人賦天  
子大說飄飄然有凌雲氣遊天地之間意



李太白集分類補註卷二十五

李太白集分類補註卷二十六

宋楊齊賢集註

元蕭士贇補註

表書

為吳王謝責赴行在遲滯表

臣某言伏蒙聖恩追赴行在臣誠惶誠恐頓首頓首臣  
聞胡馬矯首嘶北風以跼顧越禽歸飛戀南枝而刷羽

所以流波思其舊浦落葉墜於本根在物尚然矧於臣

子臣位叨盤石辜負明時才闕總戎謬當強寇驚拙有

素天實知之伏惟陛下重紐乾綱再清國步慙臣不逮

賜臣生全歸見白日死無遺恨然臣年過耳順風瘳日

加鋒鏑殘骸劣有餘喘雖決力上道而心與願違貴貪

尺寸之程轉增犬馬之戀非有他故以疾淹留今大舉

天兵掃除戎羯所在郵驛徵發交馳臣逐便水行難於

陸進瞻望丹闕心魂若飛慙墜履之還收喜遺簪之再

御不勝涕戀屏營之至謹奉表以聞

為宋中丞請都金陵表

臣某言臣誠惶誠恐頓首頓首臣聞社稷無常奉明者  
守之君臣無定位闇者失之所以父作子述重光疊輝  
天未絕晉人惟戴唐以功德有厚薄運數有脩短功高  
而福祚長永德薄而政教陵遲三后之姓於今為庶非  
一朝也伏惟陛下欽六聖之光訓擁千載之鴻休有國  
之本羣生屬望粵自明兩光岐之陽昔有周太王之興

發跡於此天啓有類豈人事歟皇朝百五十年金革不  
作逆胡竊號剝亂中原雖平嵩丘填伊洛不足以掩宮  
城之骸骨決洪河灑秦雍不足以蕩犬羊之羶臊毒浸  
區宇憤盈穹旻此乃猛士奮劍之秋謀臣運籌之日夫  
不拯橫流何以彰聖德不斬巨猾無以興神功十亂佐  
周而克昌四兇及虞而乃去去元兇者非陛下而誰且  
道有興廢代有中季漢當三七莽亦為災赤伏再起丕  
業終光非陛下至神至聖安能勃然中興乎以臣料人

事得失敢獻疑於陛下臣猶望愚夫千慮或異一得何  
者賊臣楊國忠蔽塞天聰屠割黎庶女弟席寵傾國弄  
權九土泉貨盡歸其室怨氣上激水旱荐臻重罹暴亂  
百姓力屈即欲平殄蝥賊恐難應期且圖萬全之計以  
成一舉之策今自河以北為胡所凌自河之南孤城四  
壘大盜蠶食割為洪溝宇宙岷岬昭然可覩臣伏見金  
陵舊都地稱天險龍盤虎踞開扃自然六代皇居五福  
斯在雄圖霸跡隱軫由存咽喉控帶紫錯如繡天下衣



冠士庶避地東吳永嘉南遷未盛於此臣又聞湯及盤  
庚五遷其邑典謨訓誥不以為非衛文徙居楚丘風人  
流詠伏惟陛下因萬人之蕩析乘六合之講張去扶風  
萬有一危之近邦就金陵太山必安之成策苟利於物  
斷在宸衷況齒革羽毛之所生梗枲豫章之所出元龜  
大貝充牣其中銀坑鐵冶連縣相屬剗銅陵為金穴煮  
海水為鹽山以征則兵強以守則國富橫制八極克復  
兩京俗畜來蘇之歡人多徯后之望陛下西以峨嵋為

壁壘東以滄海為溝池守海陵之倉獵長洲之苑雖上  
林五柞復何加焉上皇居天帝運昌之都儲精真一之  
境有虞則北閉劔閣南扃瞿塘蚩尤共工五兵莫向二  
聖高枕人何憂哉飛章問安徃復巴峽朝發白帝暮宿  
江陵首尾相應率然之舉不勝屏營瞻雲望日之至謹  
先奉表陳情以聞

為宋中丞自薦表

臣某聞天地閉而賢人隱雲雷屯而君子用臣伏見前

翰林供奉李白年五十有七天寶初五府交辟不求聞達亦由子真谷口名動京師上皇聞而悅之召入禁掖既潤色於鴻業或間進於王言雍容揄揚特見褒賞為賤臣詐詭遂放歸山閒居製作言盈數萬屬逆胡暴亂避地廬山遇永王東巡脅行中道奔走却至彭澤具已陳首前後經宣慰大使崔渙及臣推覆清雪尋經奏聞臣聞古之諸侯進賢受上賞蔽賢受顯戮若三道稱美必九錫光榮垂之典謨永以為訓臣所管李白實審無

辜懷經濟之才抗巢由之節文可以變風俗學可以究  
天人一命不霑四海稱屈伏惟陛下大明廣運至道無  
偏收其希世之英以為清朝之寶昔四皓遭高皇而不  
起翼惠帝而方來君臣離合亦各有數豈使此人名揚  
宇宙而枯槁當年傳曰舉逸人而天下歸心伏惟陛下  
迴太陽之高暉流覆盆之下照特請拜一京官獻可替  
否以光朝列則四海豪俊引領知歸不勝悽悽之至敢  
陳薦以聞

代壽山答孟少府移文書

淮南小壽山謹使東峯金衣雙鶴銜飛雲錦書於維揚  
孟公足下曰僕包大塊之氣生洪荒之間連翼軫之分  
野控荆衡之遠勢盤薄萬古邈然星河憑天霓以結峯  
倚斗極而橫嶂頗能攢吸霞雨隱居靈仙產隋侯之明  
珠蓄卞氏之光寶鑒宇宙之美殫造化之奇方與崑崙  
抗行閭風接境何人問五廬台霍之足陳耶昨於山人  
李白處見吾子移文責僕以多奇鄙一作僕以特秀而

盛談三山五岳之美謂僕小山無名無德而稱焉觀乎  
斯言何太謬之甚也吾子豈不聞乎無名為天地之始  
有名為萬物之母假令登封禪祀曷足以大道譏耶然  
皆損人費物庖殺致祭暴殄草木鐫刻金石使載圖典  
亦未足為貴乎且達人莊生常有餘論以為尺鷃不羨  
於鵬鳥秋毫可並於泰山由斯而談何小大之殊也又  
怪於諸山藏國寶隱國賢使吾君傍道燒山披訪不獲  
非通談也夫皇王登極瑞物昭至蒲萄翡翠以納貢河

圖洛書以應符設天網而掩賢窮月竈以率職天不秘  
寶地不藏珍風威百蠻春養萬物王道無外何英賢珍  
玉而能伏匿於巖穴耶所謂榜道燒山此則王者之德  
未廣矣昔太公大賢傅說明德棲渭川之水藏虞虢之  
巖卒能形諸兆朕感乎夢想此則天道闇合豈勞乎搜  
訪哉果投竿詣麾捨筭作相佐周文讚武丁總而論之  
山亦何罪乃知巖穴為養賢之域林泉非祕寶之區則  
僕之諸山亦何負於國家矣近者逸人李白自峨眉而

來爾其天為容道為貌不屈已不干人巢由以來一人  
而已乃虯蟠龜息遁乎此山僕嘗弄之以綠綺卧之以  
碧雲漱之以瓊液餌之以金砂既而童顏益春真氣愈  
茂將欲倚劒天外挂弓扶桑浮四海橫八荒出宇宙之  
寥廓登雲天之渺茫俄而李公仰天長吁謂其友人曰  
吾未可去也吾與爾達則兼濟天下窮則獨善一身安  
能食君紫霞蔭君青松乘君鸞鶴駕君虯龍一朝飛騰  
為方丈蓬萊之人耳此則未可也乃相與卷其丹書匣



其瑤瑟申管晏之談謀帝王之術奮其智能願為輔弼  
使寰區大定海縣清一事君之道成榮親之義畢然後  
與陶朱留侯浮五湖戲滄洲不足為難矣即僕林下之  
所隱容豈不大哉必能資其聰明輔以正氣借之以物  
色發之以文章雖烟花中貧沒齒無恨其有山精木魅  
雄虺猛獸以驅之四荒磔裂原野使影跡絕滅不干戶  
庭亦遣清風掃門明月侍坐此乃養賢之心實亦勤矣  
孟子孟子無見深責耶明年青春求我於此巖也

上安州李長史書

白嶽崎歷落可笑人也雖然頗嘗覽千載觀百家至於  
聖賢相似厥衆則有若似於仲尼紀信似於高祖牢之  
似於無忌宋玉似於屈原而遙觀君侯竊疑魏洽便欲  
趨就臨然舉鞭遲疑之間未及迴避且理有疑誤而成  
過一本無一字事有形似而類真惟大雅含宏方能恕之也

白少頗周慎忝聞義方入暗室而無欺屬昏行而不變  
今小人履疑誤形似之迹君侯流愷悌矜恤之恩戢秋

霜之威布冬日之愛睟容有穆怒顏不彰雖將軍息恨  
於長孫之前此無慙德司空受揖於元淑之際彼未為  
賢一言見冤九死非謝白孤劍誰託悲歌自憐迫於恓  
惶席不暇暖寄絕國而何仰若浮雲而無依南徙莫從  
北遊失路遠客汝海近還邛城昨遇故人飲以狂藥一  
酌一笑陶然樂酣困河朔之清觴飲中山之醇酎屬早  
日初眩晨霾未收乏離朱之明昧王戎之視青白其眼  
曹而前行亦何異抗莊公之輪怒螳螂之臂御者趨召

明其是非入門鞠躬精魄飛散昔徐邈緣醉而賞魏王  
却以為賢無鹽因醜而獲齊君待之逾厚白妾人也安  
能比之上挂國風相鼠之譏下懷周易履虎之懼慙以  
固陋禮而遣之幸容甯越之辜深荷王公之德銘刻心  
骨退思狂僭五情冰炭罔知所措晝愧於影夜慙於魄  
啓處不惶戰跼無地伏惟君侯明奪秋月和均韶風掃  
塵辭場振發文雅陸機作太康之傑士未可比肩曹植  
為建安之雄才惟堪捧駕天下豪俊翕然趨風白之不

敏竊慕餘論何圖叔夜潦倒不切於事情正平猖狂自  
貽於恥辱一忤容色終身厚顏敢沐芳負荆請罪門下儻  
免以訓責恤其愚蒙如能伏劒請纓謝君侯之德敢以  
近所為春遊救苦寺詩一首十韻石巖寺詩一首八韻  
上楊都尉詩一首三十韻辭旨狂野貴露下情輕於視  
聽幸乞詳覽

與賈少公書

宿昔惟清勝白縣疾疲滿去期恬退才微識淺無足濟

時雖中原橫潰將何以救之生命崇重大總元戎辟書  
三至人輕禮重嚴期迫切難以固辭扶力一行前觀進  
退且殷深源廬嶽十載時人觀其起與不起以卜江左  
興亡謝安高卧東山蒼生屬望白不樹矯抗之跡恥振  
元邈之風混遊漁商隱不絕俗豈徒販賣雲壑要射虛  
名方之二子實有慙德徒塵忝幕府終無能為惟當報  
國薦賢持以自免斯言若謬天實殛之以足下深知具  
申中款惠子知我夫何間然勾當小事但增悚惕一作

為趙宣城與楊右相書

某啓辭違積年伏戀軒屏首冬初寒伏惟相公尊體起居萬福某蒙恩才朽齒邁徒延聖日少忝末吏本乏遠圖中年廢缺分歸園壑昔相公秉國憲之日一拔九霄拂刷前恥昇騰晚官恩貸稠疊實戴丘山落羽再振枯鱗旋躍運以大風之舉假以摩天之翔衣繡霜臺含香華省宰劇慙強項之名酌貪礪清心之節三典列郡寂無成功但宣布王澤式酬天獎伏惟相公開張徽猷寅

亮天地入夔龍之室持造化之權安石高枕蒼生是仰  
某鳴躍無已剪拂因人銀章朱紱坐榮宦達身荷宸眷  
目識龍顏既齊飛於鴛鴦復寄跡於門館皆相公大造  
之力也而鐘鳴漏盡夜行不息止足之分實愧古人犬  
馬戀主迫於西汜所冀枯松晚歲無改節於風霜老驥  
餘年期盡力於蹄足上答明主下報相公悽悽之誠屏  
息於此伏惟相公收遺簪於少昊念亡弓於楚澤哀當  
益壯結草知歸瞻望恩光無忘景刻



與韓荊州書

白聞天下談士相聚而言曰生不用萬戶侯但願一識  
韓荊州何令人之景慕一至於此耶豈不以有周公之  
風躬吐握之事使海內豪俊奔走而歸之一登龍門則  
聲譽十倍所以龍盤鳳逸之士皆欲收名定價於君侯  
願君侯不以富貴而驕之寒賤而忽之則三千賓中有  
毛遂使白得穎脫而出即其人焉白隴西布衣流落楚  
漢十五好劒術徧干諸侯三十成文章歷抵卿相雖長

不滿七尺而心雄萬夫王公大臣許與義氣此疇曩心  
跡安敢不盡於君侯哉君侯制作侔神明德行動天地  
筆參於造化學究於天人幸願開張心顏不以長揖見  
拒必若接之以高宴縱之以清談請日試萬言倚馬可  
待今天下以君侯為文章之司命人物之權衡一經品  
題便作佳士而君侯何惜階前盈尺之地不使白楊眉  
吐氣激昂青雲耶昔王子師為豫章未下車即辟荀慈  
明既下車又辟孔文舉山濤作冀州甄拔三十餘人或

為侍中尚書先代所美而君侯亦薦一嚴協律入為祕書郎中間崔宗之房習祖黎昕許瑩之徒或以才名見知或以清白見賞白每觀其銜恩撫躬忠義奮發白以此感激知君侯推赤心於諸賢腹中所以不歸他人而願委身國士儻急難有用敢効微軀且人非堯舜誰能盡善白謨猷籌畫安能盡矜至於制作積成卷軸則欲塵穢視聽恐雕蟲小技不合大人若賜觀蒨莒請給以紙墨兼人書之然後退歸閒軒繕寫呈上庶青萍結綠

長價於薛卞之門幸惟下流大開獎飾惟君侯圖之

上安州裴長史書

白聞天不言而四時行地不語而百物生白人焉非天  
地安得不言而知乎敢剖心析肝論舉身之事便當談  
笑以明其心而粗陳其大綱一快憤懣惟君侯察焉白  
本家金陵世為右姓遭沮渠蒙遜難奔流咸秦因官寓  
家少長江漢五歲誦六甲十歲觀百家軒轅以來頗得  
聞矣常橫經籍書制作不倦迄於今三十春矣以為士

生則桑弧蓬矢射乎四方故知大丈夫必有四方之志  
乃杖劔去國辭親遠遊南窮蒼梧東涉溟海見鄉人相  
如大誇雲夢之事云楚有七澤遂來觀焉而許相公家  
見招妻以孫女便憩跡於此至移三霜焉曩昔東遊維  
揚不逾一年散金三十餘萬有落魄公子悉皆濟之此  
則是白之輕財好施也又昔與蜀中友人吳指南同遊  
於楚指南死於洞庭之上白禪服慟哭若喪天倫炎月  
伏屍泣盡繼之以血行路聞者悉皆傷心猛虎前臨堅

守不動遂權殯於湖側便之金陵數年來觀筋骨尚在  
白雪泣持刃躬申洗削裹骨徒步負之而趨寢興攜持  
無輟身手遂丐貸營葬於鄂城之東故鄉路遙魂魄無  
主禮以遷窆式昭朋情此則是白存交重義也又昔與  
逸人東嚴子隱於岷山之陽白巢居數年不跡城市養  
奇禽千計呼皆就掌取食了無驚猜廣漢太守聞而異  
之詣廬親覩因舉二人以有道並不起此則白養高志  
機不屈之跡也又前禮部尚書蘇公出為益州長史白

於路中投刺待以布衣之禮因謂羣寮曰此子天才英  
麗下筆不休雖風力未成且見專車之骨若廣之以學  
可以相如比肩也四海明識具知此談前此郡督馬公  
朝野豪彥一見盡禮許為奇才因謂長史李京之曰諸  
人之文猶山無烟霞春無草樹李白之文清雄奔放名  
章俊語絡繹間起光明洞徹句句動人此則故交元丹  
親接斯議若蘇馬二公愚人也復何足陳儻賢賢也白  
有可尚夫唐虞之際於斯為盛有婦人焉九人而已是

知才難不可多得白野人也頗工於文惟君侯顧之無  
按劒也伏惟君侯貴而且賢鷹揚虎視齒若編貝膚如  
凝脂昭昭乎若玉山上行朗然映人也而高義重諾名  
飛天京四方諸侯聞風暗許倚劒慷慨氣干虹蜺月費  
千金日宴羣客出躍駿馬入羅紅顏所在之處賓朋成  
市故時人歌曰賓朋何喧喧日夜裴公門願得裴公之  
一言不須驅馬埒華軒白不知君侯何以得此聲於天  
壤之間豈不由重諾好賢謙以得也而晚節改操棲情



翰林天才超然度越作者屈佐鄖國時惟清哉稜威雄  
雄下懾羣物白竊慕高義已經十年雲山間之造謁無  
路今也運會得趨末塵承顏接辭八九度矣常欲一雪  
心跡崎嶇未便何圖謗言忽生衆口攢毀將恐投杼下  
客震於嚴威然自明無辜何憂悔吝孔子曰畏天命畏  
大人畏聖人之言過此三者鬼神不害若使事得其實  
罪當其身則將浴蘭沐芳自屏於烹鮮之地惟君侯死  
生不然投山竄海轉死溝壑豈能明目張膽託書自陳

耶昔王東海問犯夜者曰何所從來答曰從師受學不覺日晚王曰吾豈可鞭撻寧越以立威名想君侯通人必不爾也願君侯惠以大遇洞開心顏終乎前恩再辱英眇白必能使精誠動天長虹貫日直度易水不以為寒若赫然作威加以大怒不許門下逐之長途白即膝行於前再拜而去西入秦海一觀國風永辭君侯黃鵠舉矣何王公大人之門不可以彈長劍乎

李太白集分類補註卷二十六

謹案卷二十五第六頁後三行雙花競春芳刊本  
競作竟據繆曰芑本改

第七頁後二行更造新聲刊本更訛思據崔豹古  
今注改

第七頁後三行隴頭水刊本隴訛嶺又黃華子刊  
本華訛覃又十曲也刊本十下衍四字據崔豹  
古今注改刪

第十一頁前五行雲和刊本和訛得據本詩及周

禮大司樂雲和之琴瑟句改

第十九頁前六行姑蘇臺上宴吳王刊本宴訛見  
據唐文粹及全唐詩改

第二十一頁後七行鳴鳳始相得刊本相訛何據  
全唐詩改

第二十二頁後三行其帝少皞刊本其訛黃據禮  
記月令改

第二十三頁前六行三百五十九日齋刊本脫此


七字據後漢書周澤傳增

第二十四頁前四行賣眼擲春心刊本眼訛藥據  
全唐詩及繆曰芑本改

第二十七頁後六行時時著書刊本時時下衍書  
字著訛者據漢書司馬相如傳刪改

卷二十六第九頁後二行敢沐芳負荊刊本沐芳二  
字訛作昧字據繆曰芑本改





總校官候補中書臣吳紹濬

校對官中書臣王家賓

謄錄監生臣朱學濂